



JABATAN PERKHIDMATAN VETERINAR MALAYSIA

LAPORAN LIPUTAN MEDIA

Jumaat, 30 Disember 2022

1.	Enggan ambil risiko jual telur import
2.	Pemborong di Terengganu tidak jual telur import
3.	Telur import belum masuk pasaran gua musang

DISEDIAKAN OLEH:

**UNIT KOMUNIKASI KORPORAT
JABATAN PERKHIDMATAN VETERINAR MALAYSIA**

Enggan ambil risiko jual telur import

Kuala Terengganu: Kebanyakan pemborong di negeri ini enggan mengambil risiko menjual telur ayam yang diimport dari India kerana faktor kebersihan dan kualiti yang diragui.

Tinjauan yang dibuat di sekitar bandar raya ini mendapati rata-rata pemborong mendakwa tahap kebersihan serta kualiti telur ayam yang diimport itu meragukan.

Malah, dalam tinjauan sama mendapati bekalan telur ayam tempatan turut mengalami terputus bekalan sejak tiga hari lalu.

Pemborong di Kampung Gong Kiat, di sini, Gregory Phang, 42, berkata pihaknya setakat ini tidak akan menjual telur ayam yang diimport dari India itu.

Malah, katanya, bekalan telur ayam import dari India belum ada di pasaran negeri ini, sebaliknya hanya tertumpu di Lembah Klang.

"Buat masa sekarang, kami tidak menerima telur ayam dari India dan hanya tertumpu menjual telur ayam tempatan dan Omega setakat ini. Itupun, kami sekarang menghadapi masalah bekalan terputus sejak Selasa lalu dan tidak tahu stok baharu akan tiba," katanya di sini, semalam.

Selain itu pekerja pembo-



Bekalan telur kehabisan di pemborong Cabang Tiga, Kuala Terengganu, semalam.

(Foto Faizul Azlan Razak/BH)

rong di bandar raya ini, Zalikha Zulkifli, 29, berkata pihaknya bukan saja meragui telur ayam diimport dari India itu, malah bimbang pengguna tidak mahu membelinya.

"Kita belum lagi menjual telur ayam berkenaan, malah sudah ramai pengguna mempersoal mengenai kualiti dan kebersihannya. Jadi, kita tidak

mahu mengambil risiko walaupun kerajaan memberi jaminan bekalan telur import memenuhi piawaian ditetapkan," katanya.

Ditanya bekalan telur tempatan, Zalikha berkata, Selasa lalu adalah hari terakhir mereka menjualnya sebanyak 5,000 papan yang diperoleh dari pembekal di Melaka.

"Bekalan telur yang sampai

pada Selasa lalu, dijual dalam masa kurang empat jam saja dan setiap pengguna kita mengehadkan pembelian lima papan seorang.

"Kita masih menunggu bekalan baharu yang dijangkakan tiba esok (hari ini) atau Sabtu ini (esok) dan tidak pasti berapa banyak akan dihantar pembekal," katanya.

Pemborong di Terengganu tidak jual telur import



PENGGUNA mendapatkan telur ayam yang dijual di Pasaraya Mydin Subang Jaya, Selangor, semalam.
-UTUSAN/AMIR KHALID

Oleh TENGKU DANISH
BAHRI TENGKU YUSOFF
utusannews@mediamula.com.my

KUALA TERENGGANU: Majoriti pemborong di negeri ini enggan mengambil risiko menjual telur ayam import dari India bagi menangani masalah kekurangan bekalan di pasaran.

Tinjauan di beberapa kedai borong dan runcit di bandar raya ini semalam mendapati, tiada telur ayam import yang dijual atas alasan tahap kebersihan dan kualiti bahan makanan itu yang meragukan.

Seorang pemborong, Zulakha Zulkifli, 29, berkata, dia bimbang menanggung kerugian sekiranya telur ayam import tidak mendapat sambutan daripada pengguna.

Ini kerana, katanya, harga telur ayam import lebih mahal berbanding telur tempatan dan peniaga tidak mendapat keuntungan besar.

"Lagipun kami tidak pasti tahap kebersihan dan kualitinya walaupun kerajaan memberi jaminan telur import berkenaan mematuhi piawaian serta pemeriksaan yang rapi.

"Setakat ini saya hanya menjual telur ayam tempatan, itu pun masih meruncing selepas kali terakhir menerima bekalan dari Melaka tiga hari lalu hampir 5,000 papan.

"Telur semua gred itu 'licin' dalam masa empat jam dengan setiap pembeli dihadkan lima papan seorang dan saya belum pasti bila bekalan seterusnya tiba," katanya.

Sementara itu seorang pengguna, Wan Nurul Syuhada Wan Mohamad, 31, berkata, telur ayam tempatan menjadi pilihannya berbanding telur import atas faktor kebersihan.

Menurutnya, dia lebih sanggup beratur panjang di kedai runcit bagi mendapatkan telur tempatan yang diyakini lebih berkualiti meskipun kadangkala terpaksa membeli pada harga lebih mahal.

"Telur ayam sangat mudah tercemar dengan bakteria *salmonella* dan saya kurang yakin kebersihan telur import dari India walaupun kerajaan menjamin kualitinya.

"Bekalan telur tempatan kita sudah tahu pengeluaran dari dalam negara dan saya lebih memilih telur tempatan atau telur jenis omega walaupun agak mahal untuk kegunaan," katanya.

Telur import belum masuk pasaran Gua Musang

GUA MUSANG: Bekalan telur import dari India belum dijual di pasar raya atau kedai runcit di bandar ini.

Tinjauan Utusan Malaysia mendapati, hanya telur ayam tempatan, omega dan organik dijual di pasaran ketika ini.

Seorang pelanggan, Mohd. Jamal Mohamed, 45, berkata, setakat ini dia belum melihat bekalan telur import dijual di pasar raya mahupun kedai-kedai runcit biasa.

“Bagaimanapun, kami tetap memilih telur tempatan kerana kualitinya lebih terjamin,” katanya ketika ditemui.

Seorang suri rumah, Nor Zaliha Ramli, 37, pula berkata, dia lebih gemar menggunakan telur tempatan dalam masakannya.

Katanya, dia tidak bisa dengan telur import dari India yang dikatakan berwarna putih.